

四庫全書

史部

欽定四庫全書

史部

平定準噶爾方略正編卷五十六至九

詳校官監察御史臣孫家賢

通政使司副使臣莫瞻菴覆勘

總校官進士臣朱

鈐

校對官編修臣朱

紱

膳錄監生臣

劉佳瑋

欽定四庫全書

平定準噶爾方略正編卷五十六

乾隆二十三年五月癸丑

靖逆將軍雅爾哈善等疏奏攻圍庫車城情形

雅爾哈善等奏言臣等於五月初六日至庫車之東雅爾哈托和魯見有回衆遷移踪跡次日兵抵庫車哨探副都統順德訥見庫車城附近有回人三騎因諭以兩路將軍帶領大兵擒拏賊

首撫恤爾等回衆伊等隨告知守城伯克遣其弟出城告言我等須候和卓木信息乞寬限五日順德訥令其投見伊等不敢前來惟問招降文書臣等因遣散秩大臣伯克托克托署守備馬英德筆帖式官住持回字文書交給即返托克托等至城下曉諭有兩回人接取忽城中二十餘騎突出兩回人遂擒托克托馬英德官住急返亦被追擒臣等即領兵攻城因散秩大臣

伯克鄂對之言令順德訥領兵二百名先據近城樹林城中亦以百餘騎來爭見我兵即退臣等圍城四面自未至酉城上鎗石如雨總兵閻相師被石傷首署前鋒侍衛常保住署參領觀音保及官兵人等亦有得傷者我兵亦殺賊甚多次日雲梯造成官兵從巳至酉四面攻襲賊於城堞內施放鳥鎗貝勒額敏和卓右額被傷官兵亦有得傷者兩日力攻未克臣等不勝憤

恨務期盡行殲滅此時先將賊人村落所種麥
苗蹂踐杏桑等果摘食又於卡倫擒獲回人六
名訊據供稱庫車舊有九百戶去年添駐回人
及厄魯特等共騎兵八百餘守城頭目名阿卜
都克勒木再去年沙喇斯瑪呼斯餘衆投降安
插於葉爾羌喀什噶爾小和卓木在葉爾羌大
和卓木在喀什噶爾又於阿克蘇附近之烏斯
哈雅築城以阿卜都克勒木之弟阿卜都哈里

克守之聞大兵至必來救援等語臣等現飭卡
倫人等嚴行瞭望但賊城險峻堅固威遠礮尚
不能攻所攜四大神礮係故明所造年久不甚
堅固昨於哈喇沙爾試放及此次攻城俱已斷
裂若領兵衝擊徒致傷損惟有合圍據險伊等
自生內變至額敏和卓年逾六旬尚屬壯健臣
等沿途同議伊意謂辦理霍集占等當以計取
不可力爭詢其如何設計但云到彼相機酌定

今因招降不從甚為慚愠督兵進攻被傷臣等
以言撫慰惟云受恩深重必舍身力戰等語又
伯克鄂對雖係庫車頭目其舊屬俱已被殺及
遷徙葉爾羌等處伊但能指引路徑不能招服
回人臣等伏思回人因額敏和卓等並非貴族
未能招服必須大兵辦理奏入

上諭軍機大臣曰據雅爾哈善奏稱兵至庫車攻圍
二日尚未得城等語回衆恃城為守非厄魯特

可比當以計取不可徒恃攻戰且亦難刻期成事雅爾哈善所奏情形未免失之躁急蓋畏朕責其怠玩也將軍大臣等領兵勦賊其勤怠皆在朕照鑒中不當揣摩欲速况我兵既四面攻圍扼其要路且捉生詢問知城中儲蓄無多此時即未能攻克則分兵一半令哈寧阿圍城誘令出戰或乘其防守疎懈相機攻取雅爾哈善帶兵一半離城前進聲言庫車抗拒回人已行勦殺不迎降而抗拒者

罪亦如之仍蹂其禾稼俾野無餘積即有援兵必聞風逃散且庫車回人見我兵少或出城徼利斯時威而擊之更易為力若庫車尚難攻克雅爾哈善又當迴兵併力一得庫車即可駐兵過冬明年再辦理葉爾羌等處亦可其相機設計之處不知伊等曾籌及否仍將現在情形作速奏聞又

諭曰朕因額敏和卓老成諳練熟習回部情形故命其參贊軍務並非欲伊身在行間親當矢石也今聞

奮勇得傷深為軫念著加恩賞賜御用荷包仍賞銀一千兩嗣後惟盡心協力相機辦理不可冒險攻戰致有疎虞

密諭靖逆將軍雅爾哈善等撫慰額敏和卓

上諭軍機大臣曰雅爾哈善等奏額敏和卓稍有觀望情形因招降不應奮往被傷伊並非貴族不為回人所服等語所奏非是前命額敏和卓參贊軍務不過因其熟習情形可與雅爾哈善籌畫非將

平定回部之事責成取必於伊也豈有同為大臣而聽其舍身攻戰不行勸阻之理且伊既如此効力若不加愛護以結其心或詞氣間轉有相輕之意甚至別生一事亦未可定朕深為慮念可密諭雅爾哈善好為撫慰以示鼓勵即雅爾哈善等亦不得冒險欲速致徒損官兵於事無益其相機辦理之處已另降諭旨矣

諭定邊左副將軍成袞扎布等辦理舍楞等事宜

上諭軍機大臣曰成衮扎布奏稱前往策應阿桂倘
叛賊舍楞已入俄羅斯即合兵駐邊索取等語所
見尚是但不必久待如守候數日仍無信息當告
以現在奏請行文爾薩納特衙門即行撤兵阿桂
之兵在和尼邁拉呼等處堵截布庫察罕哈薩克
錫喇成衮扎布之兵在科卜多豫備策應至所奏
令舒明帶左副將軍印回烏里雅蘇台同福祿辦
事扎隆阿隨伊在科卜多辦事伊所管盟長印信

交值班處俟車木楚克扎布到日暫行護理俱照
所請行前命車木楚克扎布在成衮扎布哨探隊
行走今不必前往并傳諭策布登扎布亦不必往
額爾齊斯仍於博羅塔拉等處查拏哈丹等餘賊
及布庫察罕等賊首俟兆惠等至伊犁會合

命新派索倫兵照進勦例賞給

上諭軍機大臣曰昨命綽爾多派索倫兵一千名往
伊犁等處駐防其整裝銀兩照進勦兵丁例減半

賞給現在進勦回部或有調遣之處著加恩照進
勦之例綽爾多即遵旨賞給豫備行裝俟御前侍
衛敦察到日帶領起程

甲寅

定邊將軍兆惠等疏奏招服布魯特等部落

兆惠等奏言臣等領兵至善塔斯嶺令巴圖濟

爾噶爾瑚爾起帶兵哨探四月三十日佐領委

署參領布尼馬甲委署防禦巴岱馬甲對音布

巴圖等見百餘騎隨至特穆爾圖淖爾之岸收其馬羣伊等放鎗救護我兵射殺三人傷一人當令厄魯特齊里克齊聲言大兵至此忽衆騎中一人告稱我等是布魯特聞大兵在和落霍漸等處勦滅厄魯特今因馬羣被收一時不識情願投順等語齊里克齊等招其頭目圖魯啟拜鄂庫并所屬六十餘人臣等詢問圖魯啟拜等據稱圖魯啟拜係薩伊克鄂拓克之比比者

即厄魯特宰桑回人伯克之謂與比舍爾伯克
分管五百餘戶又薩喇巴哈什鄂拓克亦有五
百餘戶係瑪木特呼里拜鄂庫分管舊在右部
安集延游牧去歲聞大兵平定準噶爾招服哈
薩克我等亦欲投降近聞嗎哈沁等傳說大兵
將到是以前來我布魯特人等早有歸順之心
因為準噶爾所隔如不見信請將我等或我子
弟留以為質差人前往則各鄂拓克必相繼歸

誠并派屬人協助大兵我布魯特右部十鄂石
克左部五鄂拓克我等居右今遷於哈爾哈里
固勒米圖古斯塔老具左部呼車薩老賀泰三
鄂拓克共千餘戶距右部有十五日之程俱可
令其頭目來見其餘左部二鄂拓克在安集延
右部八鄂拓克與喀什噶爾相近到彼再行招
服等語臣等曉示圖魯啟拜云我大兵所至順
者撫卹逆者誅滅準噶爾哈薩克即其驢也爾

等果誠心効順

大皇帝必加恩撫卹今大兵征討回部士馬糧餉甚足不須協助資給但選派熟識道路及招服各部落之人隨軍効力至厄魯特等盡已殲滅惟布庫察罕哈薩克錫喇等脫逃如在爾境內自當擒獻據稱並無投入之人臣等又曉示云大兵啟行時計當經由爾地

大皇帝洞鑒情形已有

恩旨前來隨恭捧

勅書譯讀宣示圖魯啟拜等叩頭告稱

大皇帝仁恩如此我布魯特婦人孺子無不歡感遂
復行禮拜臣等察其情形屬實即告以派員恭
齋

諭旨同往曉示圖魯啟拜等以馬送臣等為贊次日
臣等設宴相待令觀騎射給以緞疋烟草等物
俱各歡悅即派留任侍衛烏爾登原任侍衛托

倫泰達什達瓦屬人伯勒克原係布魯特人同
圖魯啟拜等前往招撫各鄂拓克于五月初四
日起程留其子弟為質又據巴圖濟爾噶爾等
報稱四月三十日佐領署營總達什扎卜馬甲
委署防禦拉什雅勒圖厄魯特護軍校碩端於
蒿沁托和賴見賊一騎被索倫錫勒爾圖厄魯
特齊里克齊擒獲詢知賚卜里木集賽之三十
餘戶隨阿勒巴齊鄂勒椿居住因令導至伊等

游牧阿勒巴齊鄂勒椿等俱束手迎降收其家
口馬駝軍器等語臣等即選派丁壯五十名隨
軍効力奏入得

旨巴圖濟爾噶爾瑚爾起等遇布魯特頭目即行招
服並收逃匿之厄魯特戶口此次官兵効力可
嘉著加恩將布尼達什扎卜俱授為參領拉什雅
勒圖巴岱俱授為領催仍委署防禦對音布巴圖錫
勒爾圖俱授為領催碩端齊里克齊授為藍翎侍

衛仍交部照例議叙再發孔雀翎十枝藍翎二十枝以備獎賞

諭定邊將軍兆惠等進勦回部事宜

上諭軍機大臣曰昨諭兆惠等進勦回部沿途相機辦理蓋因伊等帶兵尚少經過布魯特等處恐煩籌酌耳今布魯特頭目既已迎降雅爾哈善兵抵庫車攻城未克則伊等自可前往協助而策布登扎布亦當帶兵策應但布魯特部落無專轄頭目

或見我兵既過復行盜竊亦未可定可傳諭兆惠等務宜小心防範如果徑抵葉爾羌喀什噶爾與雅爾哈善聲息相近即調策布登扎布等前往於今年竣事更為妥協若此時尚未信息或葉爾羌等處不能即得仍回伊犁查拏哈薩克錫喇布庫察罕亦可不必拘泥前奏冒昧深入至辦理回部不能恃兵力攻取當因糧於敵且蹂其禾稼俾野無所積賊勢自窮又聞霍集占將投降之沙喇斯

嗎呼斯宰桑等殺害伊等舊屬必懷憤恨或遣軍
營厄魯持等設間招撫亦是辦理回部一策皆宜
加意辦理適據策布登扎布奏稱公品級達什巴圖
魯侍衛老格等帶兵二百名於哈什河收取烏魯
特得木齊托羅和卓等六十餘戶等語托羅和
卓等係哈柳之姪著併其家口送京其効力官兵
查明送部議叙可傳諭策布登扎布不必搜查逸
賊即領兵策應兆惠所諭兆惠之旨亦交令速行

遞送併將兆惠奏摺錄寄雅爾哈善令其以招降
布魯特情形傳示回衆知之又

諭曰據兆惠等奏稱索倫兵三千餘名久在軍營請
交黑龍江將軍於從前撤回及未經派出之索倫
達呼里等揀選二千名更換等語所奏甚是朕因
軫念軍前索倫兵効力有年已諭另派索倫兵一
千名令御前侍衛敷察帶往軍前更換此次派出
兵丁到日將應撤之兵令回游牧休息仍以恩旨

宣示若所派尚不敷用即降旨增派前往

命揀選礮位往雅爾哈善軍營

上諭軍機大臣曰雅爾哈善等奏帶往軍前之四大神礮係故明所造年久不甚堅固試行演放俱已斷裂等語著黃廷桂阿里袞於現有大神礮及其餘力可攻城之礮揀選堅固者數位派員送至雅爾哈善軍營軍前礮位關係最重從前係何人揀發乃輕忽若此著黃廷桂查明參奏交部議處

諭勸懲晉省辦解馬駝官弁

上諭大學士曰據黃廷桂查奏晉省辦解馬駝官弁分別勸懲一摺此次解赴肅州駝隻管解官弁沿途小心牧養臆分不減著交部議叙以示鼓勵其所解馬匹多有疲乏倒斃自屬該官弁等辦理不善但此次兒驄馬匹均係臨時振辦非營驛挑選者可比長途行走難免勞乏情尚可原著從寬免其議處

諭大學士管陝甘總督黃廷桂等暫緩伊犁屯田事務

上諭軍機大臣曰黃廷桂覆奏伊犁駐兵屯田一切應行豫備事宜不動聲色照常經理一摺已於摺內批諭矣現在辦理回部未竣則屯田伊犁原可暫緩惟於烏魯木齊一帶及噶爾藏多爾濟游牧之羅克倫等處極宜相度地畝廣為屯種以濟軍食并可省一切轉運之費俟將來酌量情形由近

及遠即俟一二年後亦無不可著傳諭黃廷桂及永貴定長等知之

六月乙卯朔

諭黑龍江將軍綽爾多添派索倫兵丁

上諭軍機大臣曰近因辦理回部曾諭綽爾多派出駐防索倫兵一千名具整裝銀兩俱照進勦之例賞給尚慮不敷調遣著傳諭綽爾多再於索倫兵內揀選一千名亦照前賞給銀兩與前次所派兵

丁一同起程

丙辰

命副都統福祿散秩大臣永慶乾清門侍衛額訥慎
塔爾海烏爾圖納遜帶領索倫兵丁前往軍營
効力

丁巳

中諭靖逆將軍雅爾哈善等攻取庫車等城事宜
上諭軍機大臣曰據雅爾哈善等奏現圍庫車城斷

其水草誘賊出戰二次俱有殺傷俟雲梯防牌造成後即可剋期攻取等語所辦雖是但察其情形似恐以延緩取咎不知用兵之道或遲或速惟在相機行事其軍前諸臣之勇怯朕自有明鑒不必過於急迫若尚未攻克仍即分兵略地至額敏和卓年力就衰感恩圖報力戰被傷甚屬可念此時曾否痊可其善為調攝以副聰懷再額敏和卓所言從前準噶爾人等圍城九月始克之語伊等惟

知野戰攻城自非所長且或因攻圍未克更迭往返亦未可知若久困城下此必無之事今以我兵力計一月間自應攻克卽力有未能宜分兵往攻烏什等小城其阿克蘇城或難急攻但蹂其禾稼撤回兵丁亦可至所奏回城草料漸盡現取楊桑等樹皮葉飼馬此語從何得來可作速具奏又諭曰雅爾哈善所奏庫車情形著傳諭兆惠此時若能直取葉爾羌等城擒獲逆酋自可贖疎脫哈薩

克錫喇之罪但務宜探聽雅爾哈善等信息如信
息未通亦不必冒昧前進即帶兵轉回查拏哈薩
克錫喇等至前據哈薩克人等所言哈薩克錫喇
隻身逃走及伊母渡河溺死殊不足信或借此浮
言懈我軍心因而潛行招引亦未可定兆惠回至
伊犁當加意察訪如果哈薩克有招引情事即帶
兵壓境嚴行索取自可弋獲仍將進兵情形作速

奏聞

戊午

命侍衛永德馳驛前往烏魯木齊協辦哈薩克貿易

事務

己未

議派兵牧放貿易馬匹事宜

軍機大臣奏言烏魯木齊等處與哈薩克交易
馬匹若送至巴里坤恐辦理回部需用徒多往
返請將所易馬匹即在該處牧放聽候調遣所

需牧馬兵丁應請交察哈爾總管等揀選一千
名其整裝銀兩照進勦兵丁例賞給前往烏魯
木齊將所收馬匹加意牧放萬一今年回部未
平來歲用此等兵丁接濟更為得力其帶兵大
員已遵

旨派出總管薩木都卜恐一人不足有總管敏珠爾
人尚可用或從牧廠調回與薩木都卜同行甚
為有益奏入得

旨此次派出之察哈爾官兵著派乾清門侍衛訥齊
納棟保公特通額同薩木都卜敏珠爾帶領行走其
賞給官兵銀兩著蘇巴什里達青阿帶往會同薩
木都卜等賞給餘依議

諭護軍統領努三多易哈薩克馬匹

上諭軍機大臣曰前命努三辦理哈薩克貿易事宜
曾面諭以不可多給價值現在進勦回部恐本年
未能竣事來歲需馬更多可傳諭努三俟哈薩克

以馬貿易時不妨多為購辦即價值稍昂亦可至
所易馬匹牧放需人綠旗兵雖不可用若巴里坤
有察哈爾兵當酌量揀派暫令牧放馬匹仍著一
面奏聞一面咨巴里坤大臣辦理現在擬派察哈
爾兵一千名星速前往其加意牧放以利軍行昨
命承德協辦貿易事務努三俟其到時更宜留
心指示俾得學習行走

諭山西巡撫塔永寧動帑報銷解駝雜費

可肅清吏治若一遇辦公復有捐貲之議恐不肖人員因此轉多藉口又何以飭官方集公事耶此項解駝需費著該撫查明動項咨部核銷該部即遵諭行

庚申

諭大學士管陝甘總督黃廷桂籌備馬匹糧餉

上諭軍機大臣曰黃廷桂所奏哈薩克貿易馬匹籌辦牧放事宜一摺自屬小心防範之意昨已派察

哈爾兵一千名前往烏魯木齊照看牧放可無匪
竊之慮至所稱大兵指日成功亦無需馬之處則
於軍務情形尚未稔悉現在雅爾哈善領兵進勦
回部設一時未能就緒則來年必需添派兵馬理
當豫為籌畫即口糧一項亦應酌足一二萬兵之
用庶不致臨事周章雖不必過涉張皇亦不可不
留心經畫若於哈薩克送來馬匹多為購備更屬
妥協可傳諭知之

辛酉

申諭定邊將軍兆惠等招撫回人事宜

上諭軍機大臣曰近以辦理回部機宜節次諭知兆惠雅爾哈善等伊等兩路進兵若今年能攻克葉爾羌喀什噶爾等城固善倘不能克於應行撤兵之時即在擒獲回人內酌揀數人明白曉示云大兵進剿惟欲擒獲波羅泥都霍集占與回衆無涉恐爾等被其恐嚇妄相附和今大兵雖暫時休息

來年仍必進勦亦定將田野種植盡行蹂踐務獲
二賊方止如此頻年進兵耕獲無期必致餓斃豈
不為厄魯特之續爾等若悔罪歸誠即聽於本地
各安生業有能擒獻首惡大皇帝必格外加恩爾
等與其被脅而死鋒鏑孰若來投以樂室家利害
昭然所宜熟思審處今將此意作書交爾等傳示
回衆使人知覺悟等語即行釋放似亦攻心之策
若慮逆酋等先期設備則次年即不進兵伊等亦

未必弛備也但必俟應行撤兵之時方可如此辦理再本年或不能取葉爾羌喀什噶爾僅得庫車烏什阿克蘇等城屈撤兵之期若令降人管轄恐賊復來奪據若留兵戍守兵少則力弱兵多則餉艱雅爾哈善額敏和卓等身在行間其體察情形詳悉議奏

壬戌

靖逆將軍雅爾哈善等疏奏庫車回人窮迫情形

雅爾哈善等奏言臣等攻圍庫車城於東南面
臺上瞭望城內情形甚屬窮迫詢問伯克鄂對
等據云數日內應有賽里木阿克蘇援兵臣等
議於五月十八日一面誘賊出城勦殺一面攻
取城池於先一日令哈密回人三百名更換衣
帽旗幟由阿克蘇前來大路揚塵為救援之勢
亦令我卡倫兵飛報又將滿洲索倫兵埋伏要
隘令綠旗兵張滿洲索倫旗幟前往迎戰俟賊

衆一出即截斷勦殺至日城內賊人果鳴鼓吹
角步賊登城呼噪騎賊於西門排立不敢即出
數放號火我綠旗兵遠用鳥鎗攻擊引誘賊仍
不出始將各兵撤回又與額敏和卓王素富等
酌議射書招降亦無回信看來賊衆死守必當
力攻計惟多造雲梯分路競進賊衆四面受敵
不能支吾能由一二處入城即可攻克奏入

上諭軍機大臣曰雅爾哈善等圍困庫車令回人等

改裝誘賊雖驚疑未出而情形窮迫俟攻具齊備
即可取城等語尚屬黽勉但攻城非野戰可比不
必過於欲速萬一此時未能攻克仍遵前旨分兵
攻取烏什阿克蘇等城即不能克亦可蹂其禾稼
且防守嚴密伊等窮迫之至必生內變自可成功
至攻城之道固難尅期但須時刻進兵作為攻擊
之勢使賊疲於接應漸生怠惰然後乘間猝發自
無不倉皇潰敗之理再所用官兵雖有滿洲索倫

綠旗回人等隊皆朕臣僕惟視伊等効力如何不可稍有偏向著發孔雀翎十枝藍翎二十枝交雅爾哈善等酌備賞給其加意鼓勵佇待捷音

諭定邊右副將軍策布登扎布等向哈薩克索取哈薩克錫喇布庫察罕

上諭軍機大臣曰策布登扎布等奏稱據哈薩克察哈瑪巴圖爾來告伊等從前在岳羅畢特巴圖爾必濟喀喇塔拉等處刺殺宰桑布圖庫擒獲布庫

察罕已送與阿布賚等語朕昨諭策布登扎布不
必往追舍楞侯擒拏哈薩克錫喇布庫察罕即策
應兆惠今布庫察罕既為哈薩克擒獲則哈薩克
錫喇亦必逃入哈薩克可傳諭策布登扎布在哈
薩克索取布庫察罕時并索取哈薩克錫喇前問
哈薩克錫喇逃入哈薩克之特柳克等處不妨告
知阿布賚令具遣人至特柳克以從前縛送達什
策凌齊巴罕等蒙恩厚賞為例若隱匿不送則將

牧必致驚擾明白曉示計彼時兆惠亦已回抵伊犁兩隊合力務將哈薩克錫喇布庫察罕拏獲解京仍着策布登扎布行文兆惠知之

諭大學士管陝甘總督黃廷桂查明琿齊等家口病斃虛實

上諭軍機大臣曰據阿里衮等奏稱派出護軍校額爾賽解送琿齊阿南達哈什哈索遜等眷屬一百九十二口除途次患病身死一百三十口外其餘

人造冊送往肅州候黃廷桂分別辦理等語所奏甚屬含混解送人口病故何至如許之多即使防護人少中途逃遁不過為餓斃之嗎哈沁更將何往是解送者尚可寬宥若圖脫罪匿報則斷不可著傳諭黃廷桂俟此次厄魯特家口解到將因何致斃多人及有無匿報之處查明據實具奏

癸亥

恩宥叛賊和碩齊之弟姪等仍於察哈爾安插

上諭軍機大臣曰據納穆扎爾奏稱伊至察哈爾將和碩齊之妻子正法所有馬匹牲隻交與該旗分收管其和碩齊之弟圖固里克及其妻子請旨辦理等語和碩齊負恩降賊伊之妻子自應正法其弟姪等尚可寬宥著加恩將圖固里克及其妻子仍留察哈爾安插明白宣示俾知感激其查出馬匹牲隻交與扎拉豐阿帶至軍營備用可傳諭署總管呼魯斯罕知之

諭大學士管陝甘總督黃廷桂豫備來年軍餉

上諭軍機大臣曰前經傳諭黃廷桂先期備貯糧餉
為來年添派兵丁之用今思甘省河東河西各處
向有存貯糧石原為儲峙軍需此時自應速行籌
運如本省糧已足用自不必更事採買倘為數不
敷則應咨商開泰令於四川附近甘肅各州縣先
期購運大概務足二萬官兵一歲之糧能於今冬
運至巴里坤或哈密存貯應用方為有濟其妥協

辦理勿致臨期遲悞可傳諭黃廷桂知之

議折給官兵口糧事宜

甘肅巡撫吳達善奏言軍營糧餉從肅州哈密轉運至巴里坤每石運費至十二三兩上年進勦屯田各官兵萬餘人經臣奏撥哈密倉糧二萬石今春即不敷支給又經請撥哈密甘肅三色糧二萬石運送軍營今年各項官兵計二萬餘人原數既不敷用而屯田必俟收成似應通

融辦理查向來凱旋官兵口糧多支者按日扣
抵少領者按日補給伊等在軍前或有借貸及
添置衣履多藉補給之糧出糶應用商民乘其
急需未免故抑價值請於將來平定回部凱旋
官兵抵巴里坤日其未領口糧給以二成本色
八成折價其折價無論色樣每石概以八兩定
價倘有借食他人人口糧仍准支本色其願全領
折價者亦聽其便奏入得

旨軍機大臣議奏尋議軍糧關係甚重現奉

諭旨令黃廷桂預備接濟至巴里坤存貯糧石無多

將來大兵凱旋未領口糧即需補支若概給本

色既多轉運之勞而商民又未免故抑價值應

如該撫所奏辦理庶兵丁需用既便亦可節省

運費奏入

上從之

甲子

諭定邊左副將軍成袞扎布等防範達什達瓦游牧
上諭軍機大臣曰據成袞扎布奏稱和碩齊隊內脫
出之巴爾虎兵丁克什克圖濟雅圖告稱達什達
瓦所屬八人帶同巴爾虎察哈爾兵丁二人俱逃
入哈薩克等語達什達瓦屬人未必逃入哈薩克
想亦往投和碩齊耳此時若明言伊等往投和碩
齊恐達什達瓦人衆驚疑可傳諭成袞扎布當佯
為不知仍向哈薩克索取至達什達瓦人等殊難

深信雖不必遽行辦理亦當密為防範再都爾伯特人等願於卡倫外遷移游牧與喀爾喀並無妨碍即照所請行其汗索羅木袞布因病請暫離游牧禮拜胡土克圖亦聽其自便

丙寅

申諭定邊將軍兆惠等酌量接濟糧餉

上諭軍機大臣曰據兆惠等奏稱伊等已過特穆爾圖淖爾所餘口糧無幾不能回至伊犁仍招撫布

魯特辦理回部就其所獲以給軍食等語所奏殊
不知朕軫念伊等之意譬如伊等所稱口糧不能
回至伊犁辦理回部就其所獲以給軍食之說倘
若不得將奈之何由此觀之朕實不能釋懷況伊
等果係口糧不足自伊犁起程時又何必停止巴
里坤運送口糧前後所奏自屬矛盾已諭將兆惠
等傳運糧餉仍送至伊犁交策布登扎布昨又令
策布登扎布前往策應其應接濟兆惠等口糧卽

著策布登扎布帶往給與再雅爾哈善等現在尚
未攻克庫車則葉爾羌喀什噶爾又焉能即至兆
惠等若得雅爾哈善攻勦回部信息量具力量可
以兩隊夾攻自當奮勉前進否則仍回伊犁搜捕
哈薩克錫喇等渠魁其相機酌辦作速奏聞又

諭曰兆惠等以糧餉不足為詞若本年未能平定回
部則軍食關係甚重屯田收穫諒亦無幾巴里坤
距伊犁頗遠不便一時起運當挑選駝隻陸續將

米麵等物運至吐魯番烏魯木齊等處預備可傳諭阿里衮速為接濟仍行文永貴定長令將存貯處所轉運事宜酌量辦理

定邊左副將軍成衮扎布疏奏安設臺站

成衮扎布奏言臣等從前行文和碩齊唐喀祿等俱由科卜多送往今復帶兵策應阿桂若仍派兵徑送則需人多而事轉遲滯今自起程之地約行四百里即留二十五人派員安設臺站

交與主事明善總管計抵俄羅斯界止需二百餘人庶事件不至稽遲馬駝亦得休息奏入報

聞

丁卯

賜三等侍衛伍岱號墨爾根巴圖魯賞銀一百兩

授厄魯特台吉舒倫哈什哈宰桑塔什為三等侍衛

及厄魯特二等侍衛袞楚克扎卜賞銀各五十兩

在京居住

戊辰

諭定邊左副將軍成衮扎布等酌量撥兵駐劄

上諭軍機大臣曰叛賊舍楞等計此時已竄入俄羅
斯布空郭勒等處亦未必有逃來之厄魯特阿桂
等在彼堵截徒糜糧餉著傳諭成衮扎布阿桂等
若阿桂報稱舍楞尚未遠竄成衮扎布宜速行策
應如未得信息即不必前往仍回科卜多駐劄阿
桂奉到此旨亦視舍楞之遠竄與否若賊衆已過

無復逃來之人即派兵嚴密搜捕遇有嗎哈沁俱
行勦殺以十五日為期亦回科卜多軍營仍將現
在堵勦情形作速奏聞

平定準噶爾方略正編卷五十六

欽定四庫全書

平定準噶爾方略正編卷五十七

乾隆二十三年六月己巳

靖逆將軍雅爾哈善等疏奏防範庫車城應援要
路

雅爾哈善等奏言臣等攻圍庫車城與領隊大
臣及伯克鄂對等共議回城雖係土築頗屬高
堅此時賊衆不敢出戰自應多備雲梯土袋於

夜間努力攻取一面絕其水道又據鄂對告稱
回衆俱為阿卜都克勒木刼制未必投降所有
各城應援要路俱宜安設卡倫城東南通庫爾
勒哈喇沙爾係我兵來路現有臺站軍營尚無
可慮惟準備截殺援兵城北通賽里木一帶高
山遮隔有沙勒達朗鄂斯克伯什二隘口若以
石壘塞自難偷越彼處只有山泉可駐步兵防
守城西通沙雅爾六十里有鄂根河水長時

可以行舟若安臺瞭望自無遲悞等語臣等即
分派侍衛等查勘派兵防範五月二十日守備
莫倫岱領綠旗兵八十名至沙勒達朗壘塞隘
口忽山內有百餘騎突出莫倫岱射賊三人官
兵鎗矢競發傷賊數十人向西敗走想係阿克
蘇等處偵探之賊二十三日四鼓署叅領第雅
隆阿在城東北築壘處埋伏見有馬步賊二百
餘人即領吉林索倫兵五名綠旗兵三十名從

牆洞內放鎗發矢追至城下賊人墜馬受傷者甚衆計殺賊五十餘人其莫倫岱擬請陞補都司柏萃病故員缺第雅隆阿等應請送部議叙臣等又詢問軍營伯克及順德訥等知霍集占等係傳授經教之人得脫回巢僭稱汗號殺害伊舊台吉素爾統等後嗣因令順德納作書聲其罪惡招撫衆回其額敏和卓面傷現已平復又准將軍兆惠咨五月初旬已至布魯特游牧

臣等仍候攻具齊全相機辦理並繪圖恭呈

御覽奏入

上諭軍機大臣曰雅爾哈善等以攻圍回城防守要隘繪圖具奏辦理頗屬奮勉諒賊衆自難久守倘尚未攻克仍分兵前進揚言已取庫車懈其應援再用兵之道捉生詢問可知虛實今我兵殺賊五十餘傷賊三十餘而未見擒獲一二人何耶此時賊衆即出城交納兵器乞降仍宜整肅隊伍於各

要害加意巡防勿以輕敵受欺所奏勦賊之第雅
隆阿著交部議叙莫倫岱即陞補都司其効力得
傷官兵俱著照例議叙另摺所奏伊犁屯田尚非
目前急務自可從容辦理

庚午

命直省等處購備馬匹

上諭軍機大臣曰巴里坤一帶現在墾種地畝甚多
兼之辦理回部均需豫備馬匹若就陝甘兩省採

買一時恐難足數應於附近各省分路採買自易
為力直隸著辦馬三千五百匹山西二千五百匹
山東河南各一千匹陝西二千匹著傳諭各督撫
即派委賢員速為購辦解赴肅州交總督黃廷桂
驗收轉解務于十月內趨至巴里坤以備派撥各
省若能及時買足固善或不能趨辦准於營驛馬
匹內挑選壯健者湊足解往其缺額限本年內陸
續買補併傳諭黃廷桂知之

辛未

命涼州將軍嵩阿禮監鑄礮位

上諭軍機大臣曰據黃廷桂奏稱甘肅等處現存礮位年久不堪應用現在僱覓良工趲造大神礮二十三位請交嵩阿禮監造就近演放交臣轉解等語軍營現需礮位自宜製作精堅著傳諭嵩阿禮督同鎮道等員監視工匠加意鑄造但必俟全數鑄就始行轉解未免稽遲時日且解送亦殊繁費

惟酌量鑄成三四位或五六位即為一起轉解可也

諭大學士管陝甘總督黃廷桂續查解送人口病斃虛實

上諭軍機大臣曰據阿里衮等奏稱將軍兆惠派佐領巴濟勒圖等解送厄魯特訥默庫等男婦二百三口中途病故四十一口又署章京烏拉凱等解送賚瑪里木集賽等二百六十口病故一百九十

九口等語前因解送厄魯特致斃多人曾交黃廷
桂查明具奏今兩次所解四百餘人復斃其半殊
屬可疑著仍交黃廷桂將因何致斃多人及有無
捏報情弊查明據實奏聞

甲戌

諭靖逆將軍雅爾哈善等進取回城事宜

上諭軍機大臣曰據雅爾哈善等奏稱侍衛噶布舒
齊凌扎卜等領兵渡鄂根河至沙雅爾城擒獲伯

克之子喀啟巴巴克等復近城招降不從誘令交
戰亦不出因泥濘未能衝擊將擒獲賊衆俱行勦
殺惟留喀啟巴巴克送京備詢等語據喀啟等所
供則沙雅爾並非大城雅爾哈善等不必久留攻
擊致稽時日宜進取阿克蘇等城既克之後此等
小城自然畏懼降服至所供沙喇斯瑪呼斯等餘
賊竄入庫車為逆酋拒守攻克之日不可稍存姑
息即回衆開門獻城亦應分別查訊或撫或勦此

次進攻沙雅爾雖侍衛喀喇等有所俘獲而毀其
種植俾野無餘積未見奏及何耶現因辦理回部
已調索倫兵二千察哈爾兵一千健銳營兵一千
名并挑選健馬一萬匹遣往巴里坤豫備可傳諭
雅爾哈善知之

諭定邊將軍兆惠等曉示布魯特人等協力進勦回
部

上諭軍機大臣曰雅爾哈善等訊問擒獲賊人供詞

有云兩和卓木曾殺害舊頭目伊克和卓木其子
逃入布魯特現在撫養等語看來布魯特人衆與
逆酋有隙前諭兆惠等速向阿克蘇不必從布魯
特取道此時若尚在布魯特即曉示伊游牧人衆
若能協力進兵則所有沿途俘獲當酌量賞給以
示鼓舞即同抵葉爾羌喀什噶爾擒勦逆酋其留
心體察相機辦理

申諭定邊右副將軍策布登扎布等速向哈薩克索

取哈薩克錫喇

上諭軍機大臣曰據策布登扎布等奏稱領兵搜查
阿呼爾哈爾海等處並無舍楞踪跡六月初一日
由阿勒坦特卜什起程往塔爾巴噶台計二十日
可至布空哈拉瑪嶺等語舍楞已竄入俄羅斯策
布登扎布不必復往追襲仍遵前旨至哈薩克索
取哈薩克錫喇等且伊等所奏哈薩克約倫伯克
巴圖爾等云哈薩克錫喇不知被阿布勒哈里之

人擒獲與否我等相隔甚遠等語則愈為可據更宜速往查拏勿致遲悞

命尚書納穆扎爾侍郎三泰馳驛前往軍營

上諭軍機大臣曰兆惠雅爾哈善富德等久在軍營冬季撤兵當來京請訓並籌辦一切事宜著尚書納穆扎爾侍郎三泰馳驛前往西路軍營以叅贊大臣行走亦可漸習軍務兆惠等來京時其將軍印務即令納穆扎爾署理

授察哈爾賽音圖為藍翎侍衛

上諭軍機大臣曰察哈爾獎賞翎賽音圖曾擒獲勞
章扎卜且於舍楞誘害官兵時奮勇脫出甚屬可
嘉著加恩授為藍翎侍衛賜號固濟爾巴圖魯仍
賞銀一百兩

乙亥

諭靖逆將軍雅爾哈善等籌備駐兵糧餉

上諭軍機大臣曰昨閱雅爾哈善等進攻沙雅爾之

奏已諭以不必攻圍此等小城惟將田野種植毀
棄即前往阿克蘇等處今思本年若未能攻取葉
爾羌喀什噶爾僅得庫車阿克蘇等城至應行撤
兵之時若仍為賊人所據來年又煩辦理自當留
兵戍守則糧餉亟宜籌備可俾諭雅爾哈善等此
時攻城之際不妨令綠旗及回人等刈賊之穀以
濟口糧其未成熟者亦不必毀棄蓋賊既不敢出
城則種植業為我有且克城之後賊人口糧非食

用俱盡即焚棄不留自當豫圖接濟惟與賊相近
及我兵不必駐劄之地則仍行毀棄可耳至駐兵
既遠糧運宜早為經理現在巴里坤所儲糧石當
陸續運往回部復由內地撥運巴里坤備用若馱
載維艱回地頗屬平坦或可兼用車驢否亦傳諭
黃廷桂阿里衮等籌酌具奏

丙子

黑龍江將軍綽爾多等疏奏續派索倫等官兵

事宜

綽爾多等奏言臣等奉到

諭旨續派索倫兵一千名同前派官兵前往軍營查
現在索倫達呼里共二千三百餘名不敷挑選酌於
呼倫貝爾等處之索倫巴爾虎兵內湊足一千具派
出管轄官員俸餉銀兩均照前次賞給其軍器等件
於齊齊哈爾等處湊辦共派索倫兵二千名候

御前侍衛敦察等至日帶領起程奏入報

聞

丁丑

諭定邊左副將軍成衮扎布等策應阿桂邀擊舍楞
上諭軍機大臣曰成衮扎布等據和碩齊隊內脫出
之厄魯特叅領鄂勒椿告稱逆賊舍楞逃至俄羅
斯圖喇附近先遣五人送信聞已被拘執狐疑不
決欲投往土爾扈特復遇哈薩克四百人舍楞率
衆迎敵哈薩克等佯退相誘成衮扎布即派藍翎

侍衛拜靈阿知會阿桂令其邀擊等語所辦甚是
舍楞既未入俄羅斯又遇哈薩克之衆或仍回塔
爾巴噶台和尼邁拉呼必與阿桂相遇自可擒獲
成袞扎布等仍整兵前往策應至鄂勒椿係散秩
大臣鄂齊爾之弟中鎗被擒乘間脫出途遇索倫
協領阿喇卜坦等殺馬共食步行回營甚屬可嘉
著加恩授為二等侍衛賜號錫都爾呼巴圖魯賞
銀一百兩可傳諭三寶曉示達什達瓦游牧人等

知之

戊寅

申諭定邊左副將軍成衮扎布等宜速取舍楞實信
上諭軍機大臣曰昨諭成衮扎布等策應阿桂擒拏
逆賊舍楞因思伊等所帶口糧僅敷九月以前之
食若屆期未能竣事仍須接濟今福祿已奏請預
備三箇月口糧牲隻由科卜多運送軍營成衮扎
布等自可咨取無悞至脫出之鄂勒椿曾到阿桂

軍營自必早得賊人實信阿桂即當一面知會成
袞扎布策應一面將辦理緣由奏聞何以總未奏
及豈疾行追賊無繕摺之暇耶著成袞扎布即行
傳諭令其速奏倘阿桂以鄂勒椿情事因成袞扎
布奏聞致降旨詢問遂爾心生猜忌則徒自取罪
戾耳

已卯

諭定邊左副將軍成袞扎布等速取逆賊舍楞

上諭軍機大臣曰據成衮扎布等奏和碩齊隊內脫
出達什達瓦兵丁沙喇巴圖爾告稱五月初舍楞
等遣人入俄羅斯未回又欲他往俄羅斯復行阻
止遂以舟相渡安插於森博羅特城附近請遣人
至彼索取並將所發俄羅斯文書呈覽從前成衮
扎布起程之時即諭以舍楞若入俄羅斯即行索
取今脫出人等所告確有可據自當一面索取一
面奏聞乃必再行請旨以致稽延時日實所不取

但此時若仍行向索則伊圖喇人等反得飾詞預
備成衣扎布不妨領兵潛至森博羅特若舍楞在
彼棲止我兵即徑行擒勦若已經聞信遷移則仍
聲言索取惟在相機辦理沙喇巴圖爾被擒脫出
著賞銀五十兩令回游牧休息其策布登扎布不
必追勦舍楞仍向哈薩克索取哈薩克錫喇并促
圖倫楚達理善等速清哈丹阿巴噶斯餘孽所降
諭旨亦由西路臺站馳遞

諭叅贊大臣阿桂等勦殺往投舍楞之嗎哈沁

上諭軍機大臣曰據黃廷桂奏稱詢問解到之彈齊等家口在博羅布爾噶蘇台等處遇嗎哈沁搶掠人口牲畜俱係舍楞所屬等語此等嗎哈沁雖欲往投舍楞斷不能及且有阿桂在彼堵截可傳諭阿桂務必留心擒勦又解送人等亦有在托里等處被掠之語并傳諭永貴等酌量派兵前往仍知會豆斌一體搜捕嗎哈沁不可致令逃脫

庚辰

諭巴里坤辦事副都統阿里衮等查奏捏報解犯病
故官兵

上諭軍機大臣曰黃廷桂奏稱詢問軍營解到之厄
魯特等知搶掠人口牲隻係舍楞屬人等語從前
阿里衮等奏報節次解送厄魯特等中途病故過
半朕曾降諭旨謂脫逃數名而解送之人不過疎
防若捏報則為欺罔因諭黃廷桂查奏今據奏實

係被賊掠奪其病故者祇有數人當日抵巴里坤
時何以並未查詢可傳諭阿里衮此次管解人口
各官兵若仍在巴里坤即遵前旨分析查詢酌量
議罪具奏若已回軍營亦行文將軍大臣等查明
議罪

諭大學士管陝甘總督黃廷桂等籌辦牧養馬匹事
宜

上諭軍機大臣曰昨諭直隸山東山西河南陝西等

處購馬一萬匹由肅州轉送巴里坤豫備來年進
兵之用計送到時已屆冬寒彼處雖可牧放恐馬
匹臆分已減難於長發不若分槽養自易充肥
巴里坤現未備貯草料由內地解運恐難如期足
用或留其半於肅州一帶俟需用之前再行趲送
亦可但我兵計日可取庫車阿克蘇等城即宜留
兵戍守來年從此進兵若能於巴里坤吐魯番等
處籌辦草料或即起此時起運將馬匹陸續解送

更善可傳諭黃廷桂酌議具奏有應行事宜亦可
先舉併傳諭阿里衮永貴等與黃廷桂會商辦理
卒已

靖逆將軍雅爾哈善等疏奏勦殺應援庫車賊
衆

雅爾哈善等奏言臣等圍困庫車城派兵防範
要隘據伯克鄂對告稱城東面安設臺站之雅
哈托和魯有地名托木羅克可通賽里木拜城

亦宜防範臣等即派藍翎侍衛達克塔納領綠
旗兵一百八十名前往六月十五日據報托木
羅克有賊人踪跡帶兵往迎見嘛尼轟一桿賊
衆五六十名後面又有兩大隊誘至雅哈托和
爾賊止不行見我兵甚少遣四五百人兩路來
攻我兵緩行相誘體察賊衆不及三千人在戈
壁前溝邊住歇臣等即派兵二千四百名令順
德訥愛隆阿端濟布袞楚克朗袞扎卜五福帶

領侍衛官員等前往次日黎明排列隊伍綠旗
回兵居中滿洲索倫蒙古兵分為兩翼往迎已
刻賊望見我兵即據溝邊高阜排列彼此施放
烏鎗賊正欲衝我兩翼我兵四面呼噪發矢放
鎗合圍攻擊賊衆大亂擁聚溝中惟以鎗刀格
鬪我兵奮勇擊射自午至未盡行勦殺僅逃脫
一二十人俱已帶傷計勦賊二千餘人亦有厄
魯特在內我兵陣亡者數人得傷者亦少獲馬

千餘匹殺傷者亦千餘匹駝百餘隻鳥鎗千餘
桿似礮鳥鎗二十桿又帶鞍馬二匹詢問俘獲
人口供稱係領兵伯克阿卜都哈里克等之馬
又據供聞得霍集占由沙雅爾路來援沙勒達
朗一路亦有前來者因大營滿洲索倫兵少順
德訥等即收兵回營防範初九日據坐臺人等
告稱距沙雅爾五六十里有行塵火光等語臣
等即派兵往鄂根河偵探所有奮勉勦賊官兵

侯辦過沙雅爾來援之賊再行查奏又擒獲受傷回人阿舒爾瑪特係伯克霍集斯屬人從前達瓦齊係其執送謹暫行看守以備詢問其餘賊即行正法奏入

上諭軍機大臣曰據雅爾哈善等奏勦殺應援庫車賊衆二千餘人等語賊衆初次來援我兵即勦殺殆盡其鋒已挫諒葉爾羌喀什噶爾等處無難攻取官兵奮勉効力深屬可嘉雅爾哈善額敏和卓

玉素富哈寧阿順德訥愛隆阿各賞御用荷包鼻
烟壺仍交部議叙端濟布袞楚克朗袞扎卜五福
俱著議叙其奮勇勦賊及陣亡得傷官兵著查明
送部議叙議卹伯克鄂對熟悉要隘豫籌防範著賞
銀一百兩現在有攻克之回城即授為伯克藍翎
侍衛達克塔納授為三等侍衛此次所勦殺賊
衆因應援庫車而來其俘獲之人當遣往城下曉
示令其絕望不知曾如此辦理否再據俘獲人等

所供霍集占將有來援之信則葉爾羌喀什噶爾
自可乘間襲取兆惠此時或候雅爾哈善信息兩
路夾擊或仍回伊犁搜捕餘孽可傳諭令其詳悉
奏聞

命派健銳營官兵前往西路軍營

上諭軍機大臣曰著派健銳營兵一千名前往西路
軍營効力該營大臣務須加意挑選仍行文經過
之直隸山西河南陝西甘肅等省照例備辦車馬

諭大學士管陝甘總督黃廷桂辦理軍需事宜

上諭軍機大臣曰甘省連年承辦軍需雖一絲一粟
不以派累閭閻而起送兵丁轉輸糧餉多資民力
急公趨事朕心時廛於懷今歲得雨較遲更為軫
念此時各屬曾否徧霑雨澤秋收不致甚歉從前
未種之地曾補種雜糧否當此連年餽運之後繼
以雨澤愆期米穀自必短少黃廷桂於拮据勞動
之後更宜曲為體恤現在派出京兵一千前往軍

營朕意即令其裹帶四個月口糧以省甘肅購備之費是否簡便可行於邊民有益著傳諭黃廷桂籌酌具奏再前經降旨令該督豫備來年征兵口糧如本省不敷則移咨開泰於四川購運務足二萬人一歲之用並著速行會商妥協辦理

辦理屯田侍郎永貴等疏奏新種地畝情形

永貴等奏言臣等前奏本年屯田地方闢展烏魯木齊已經墾種喀喇和卓托克三哈喇沙爾

尚在開墾今據各該管官員報稱喀喇和卓墾地
八千七百畝托克三懇地五千三百畝哈喇沙
爾墾地四千餘畝俱經種植臣等合併闡展所
種一萬畝烏魯木齊所種八千畝共三萬六千
八百餘畝較去年增墾七千三百餘畝所種禾
苗先後長發臣等督率官兵盡力耕耘引水灌
溉今秋可望豐收奏入報

聞

壬午

諭吐魯番公素賚璫派兵巡查臺站

上諭軍機大臣曰據屯田侍郎永貴等奏稱巴里坤解送軍營火藥鉛子等件行至庫爾勒臺站遇賊搶掠等語此等賊人或係沙喇斯瑪呼斯之馬哈沁今大兵進勦臺站關係最要已諭巴里坤大臣派兵巡查吐魯番公素賚璫乃貝勒額敏和卓之子伊父感激朕恩在軍營奮勉効力伊必克承父

志將軍雅爾哈善所設臺站距吐魯番不遠且聞
搶掠之賊僅三十餘人可傳諭素賚瑞即派所屬
數十人來往巡查搜捕逸賊務期勦殺淨盡以清
臺路

大學士管陝甘總督黃廷桂疏奏豫備口糧牲
隻等事宜

黃廷桂奏言臣欽奉六月初九日

諭旨來年添派官兵先期購辦口糧查官兵二萬合

之隨役餘丁約二萬五千餘人每名日給米八
合三勺或炒白麵一觔計一年約需糧餉七萬
六千石有奇須豫備十萬石方覺充裕現在撥
運哈密倉糧六萬石祇足備巴里坤接濟軍需
及本年軍營屯田臺站兵丁支用臣與司道等
官籌議甘省河西糧石節經動撥河東各屬尚
堪接濟謹酌於涼州寧夏蘭州鞏昌四府屬州
縣內分撥米四萬石小麥四萬石青稞二萬石

運赴肅州轉運出口以備來年二萬官兵之餉
至甘省倉糧仍須撥補若資川省協濟則棧道
險阻運費不貲應請於陝西近甘各屬採買京
石米麥二十萬石以豐儲峙至羊隻一項本年
前後購買共六萬隻於正月間解送出口風雪
甚大疫癘傳染倒斃二萬四千隻有奇現在調
取管解各員分別懲治臣謹捐買一萬二千隻
賠補其半餘於購辦各州縣及差委各鎮營分

賠解送以備兩路官兵凱旋口糧此時軍營口糧正須接濟又運送軍器農器均需駝隻來年派兵二萬加以屯田運糧必備駝一萬隻查山西歸化城直隸張家口外俱係產駝之處若山西辦駝六千直隸辦駝四千尚易集事又現在運補哈密倉糧及來年官兵口糧共十六萬石前次陝省買騾三千頭輓運日久恐有缺乏查山西河南二省商民騾頭甚為充裕若每省買

騾一千五百頭似亦易辦伏祈

訓示奏入報

聞

諭分購軍需駝騾

上諭軍機大臣曰西路進兵需用駝隻已派出副都
統阿蘭泰員外郎烏勒木濟齋銀前往西林郭勒
等處購辦阿蘭泰等到彼即會同阿霸垓親王索
諾木喇卜坦等揀選健駝三四千隻送往巴里坤

索諾木喇卜坦從前承辦事件實心經理是以此
次特加委任著傳其前赴木蘭圍場其購辦駝隻
如何解送行走俟議定後再行傳諭又

諭曰甘肅為軍需總運一切起送兵丁轉輸糧餉需
用駝騾自難一時猝辦著傳諭方觀承於直隸辦
駝四千隻塔永寧於山西辦駝三千隻吳士功於
陝西辦駝一千隻并騾一千五百頭胡寶琮於河
南辦騾一千五百頭其各速為購覓務得口輕膘

壯者於今年九月十月內趲解肅州以利軍行其所發官價若有未足不妨酌量加增仍一面辦理

一面奏聞

恩賞大學士管陝甘總督黃廷桂銀兩

上諭軍機大臣曰甘省連年辦理軍需黃廷桂急公集事俱無貽悞今歲春夏以來一切轉運糧餉復甚妥協勤勞懋著深慰朕懷著加恩再賞銀一萬兩於軍需正項錢糧內支取以示體恤

議解送軍需駝隻

軍機大臣奏言臣等遵

旨傳諭阿霸垓親王索諾木喇卜坦等購買駝隻查
去年山西駝隻官價十八兩較市價不足蒙

恩旨按隻加增二兩此次應請每隻定價二十兩計
駝四千隻給銀八萬兩七八月間似可購辦足
數彼時雖有調往西路索倫兵可由阿濟必濟
一路但送至巴里坤早已水草枯涸恐致疲乏

臣等酌議現在直隸山西陝西俱買駝解送應將西林郭勒駝隻就近送至殺虎口歸併山西駝隻內送往肅州則內地草豆甚便自可一體壯健於軍需有益如蒙

俞允臣等行文山西巡撫及該親王遵照辦理奏入上從之

軍營効力之厄魯特巴圖根敦扎卜由巴里坤至京俱

授為藍翎侍衛在上駟院行走賞給銀兩衣服如例
癸未

諭靖逆將軍雅爾哈善等以收獲口糧牲畜賞給兵

丁

上諭軍機大臣曰昨據雅爾哈善等奏稱勦殺由托
木羅克來援賊衆獲馬千餘匹傷斃馬亦千餘匹
駝百餘隻等語此次勦賊二千餘收獲馬駝甚多
且賊衆自必裹帶口糧應為我有官兵奮勇勦賊

自當均勻賞給以示鼓勵且可減內地轉運之勞
何以未見奏及可傳諭雅爾哈善等留心辦理
命釋回人莽噶里克之子白和卓

授為三等侍衛賞衣一襲在上駟院行走

甲申

訓諭定邊將軍兆惠等查拏哈薩克錫喇

上諭軍機大臣曰兆惠等接到節次諭旨奏請停止
前往回部俟招服布魯特事竣即分兵追擒哈薩

克錫喇布庫察罕等語覽伊等奏摺富德除被布
庫察罕偽降逃脫外尚知自勵兆惠身為將軍於
哈薩克錫喇等渠魁未能弋獲且初遇哈薩克人
等已知哈薩克錫喇等所向即解送來京之特克
勒德克亦稱哈薩克錫喇投西哈薩克特柳克布
庫察罕投北哈薩克汗巴巴兆惠豈竟不行詢問
若伊等早抵哈薩克邊界索取何至逃脫乃此時
尚稱或投入特克斯阿圭雅斯等處亦未可定欲

分兵搜捕顯係掩飾前非希圖卸過且伊等奏報
往往前後不符如兆惠由伊犁起程曾將運送糧
餉退回後又云口糧缺乏不能回至伊犁今復云
所存口糧尚敷十數日觀此情形則伊等惟圖草
率結局耳再伊等領兵二千餘名請往回部朕尚
慮其少今復分為三隊而富德又取道布魯特境
內愈為可慮現在策布登扎布由塔爾巴噶台前
往哈薩克索取布庫察罕兆惠亦有布庫察罕為

哈薩克之布喇鄂拓克人等所擒已解送阿布賚處之語想不久自當縛獻富德索取哈薩克錫喇既由沙喇擘勒著策布登扎布帶兵往迎若賊果投特柳克恐不似阿布賚之已經歸附即時縛獻富德惟酌量進兵查拏策布登扎布亦領兵策應以壯聲援再兆惠等前奏領兵已至布魯特不便復回朕又諭以若布魯特距回城較遠即問道襲取阿克蘇與雅爾哈善會合此時諒已奉到若業

經遵照即毋庸復回總在酌量軍前形勢相機辦理仍將進兵情事作速奏聞

訓飭叅贊大臣阿桂追賊不力

上諭軍機大臣曰阿桂奏稱詢問由逆賊舍楞處脫出之厄魯特鄂勒椿謂舍楞不能入俄羅斯將由哈薩克逃往土爾扈特或又不能達恐復回準噶爾藏匿必在輝巴朗經過一面派兵於彼處守候仍探取實信若已入哈薩克相距甚遠即帶兵索

取候其擒送等語從前成袞扎布詢問鄂勒椿後
即行奏聞朕因鄂勒椿過阿桂軍營曾給以口糧
阿桂自應一面具奏一面領兵速追舍楞方可得
真實信息乃成袞扎布又續奏舍楞入俄羅斯之
信而阿桂始以鄂勒椿所告奏聞且稱舍楞若逃
去已遠不能追及即在哈薩克邊界駐候擒送更
屬錯繆阿桂初次領兵理應奮勉乃即如此觀望
遲延甚屬不堪造就著傳旨嚴行申飭

平定準噶爾方略正編卷五十七

欽定四庫全書

平定準噶爾方略正編卷五十八

乾隆二十三年秋七月乙酉朔

諭靖逆將軍雅爾哈善等與定邊將軍兆惠合兵相

機擒拏霍集占

上諭軍機大臣曰雅爾哈善等奏稱遣總管扎爾善等至鄂根河瞭望未見賊踪又沙雅爾有兩路可通庫車若遣兵前往恐與來援賊衆不能相值惟

嚴設卡倫防範等語所辦甚是看來伊等所領滿洲索倫兵尚少昨因兆惠有分兵向厄魯特回部交界搜捕哈薩克錫喇等之奏檢閱地圖所指道途距回部甚近兆惠即前赴雅爾哈善所在以兵相付仍來京請訓若另有辦理之處則俟事竣來京亦可又雅爾哈善等奏擒獲回人阿舒爾瑪特據供前副都統阿敏道被拘霍集占曾云大國使臣不可傷害留侯布魯特信息若不能取勝則仍

有用處等語似阿敏道尚未被害將來取葉爾羌
時宜籌畫阿敏道脫出之策或此時霍集占見事
勢已迫詭稱不敢傷害欲行送回以緩我兵不妨
乘機撫納俟其投見即時拏解若霍集占雖未害
阿敏道仍留以為質則告以阿敏道已照陣亡例
賞卹爾等送與不送俱可仍一面進兵辦理但能
將阿敏道救出則更善第不可因此墮賊計中致
悞軍事可傳諭雅爾哈善兆惠等知之

命陞敘防守沙勒達朗卡倫官兵

上諭軍機大臣曰雅爾哈善等奏稱沙勒達朗卡倫
守備莫倫岱遇賊衆馬步六百餘前來衝擊率步
兵百餘人迎敵殺賊甚衆身亦被傷等語莫倫岱
以少勝衆奮勉可嘉著加恩以遊擊即用賜號墨
爾根巴圖魯賞戴孔雀翎并賞銀一百兩其効力
及陣亡得傷官兵著查明送部議敘議卹
諭定邊右副將軍策布登扎布酌量馬力進兵

上諭軍機大臣曰策布登扎布前奏和落霍漸之捷
已加恩賜以伊父超勇之號今詢問擒獲之鄂哲
特等知賊衆先將游牧移踞高岡伏兵邀擊我師
策布登扎布等奮勇衝突賊不能支持衛瑪琬等
亦奏稱我兵甚少副將軍身先士卒所向無前等
語朕聞之實為嘉悅著加恩賞繫金黃帶以示旌
異至策布登扎布敗賊之前已得舍楞逃竄信息
彼時未即追勦或因不能兼顧亦事勢使然此時

布庫察罕逃入哈薩克料伊部自必縛獻惟哈薩克錫喇往投西哈薩克之特柳克富德兵少窮追稍覺可虞昨已諭策布登扎布策應自必奮勇前往但亦須酌量馬力倘有不足即與富德撤兵暫回伊犁俟來年再舉亦可在他人遲延觀望朕每降旨催督策布登扎布天性勇往是以諭令酌量現在領兵所至情形如何可即速奏聞

戊子

大學士管陝甘總督黃廷桂疏奏撥運巴里坤糧餉

黃廷桂奏言竊巴里坤為軍需總匯之區備貯兵糧最關緊要今年春間甘肅撫臣吳達善奏准於哈密甘肅等處撥運各色糧二萬石經臣飭令沙州各衛協濟長車五百輛並廣催駝騾現在陸續運竣恐車駝分散難於催覓仍令軍需局查議添撥一萬石在案臣因近奉

諭旨派出索倫察哈爾兵丁明年又添派官兵二萬
須豫備一歲口糧請於甘省各屬運糧十萬石
乘此夏秋之間道路便於行走又值哈密車輛
駝騾聚集之時應先從哈密存貯糧石內米麪
兼撥儘力運送巴里坤務於九月前運足五萬
石其哈密缺額再於內地運往補足庶儲恃有
資不致臨期周章繁費奏入報

聞

庚寅

靖逆將軍雅爾哈善等疏奏擊敗霍集占援兵
雅爾哈善等奏言六月十六日黎明據攻圍庫
車城官兵報稱西門外有賊衆踪跡復據瞭望
兵丁報稱離城十里有二三處賊衆等語臣等
議將滿洲索倫蒙古綠旗兵丁派領隊大臣順
德訥愛隆阿端濟布袞楚克朗袞扎卜馬得勝
等帶領侍衛官員分路迎勦臣等駐兵高曠之

地見塵埃坐起中我兵衝擊賊陣自卯至辰賊衆不支紛紛逃竄我兵追勦六十餘里直抵鄂根河未刻始收兵回營據愛隆阿報稱領吉林索倫等兵至庫車城南據遣往沙雅爾路埋伏之索倫協領阿定保等望見賊踪即前往迎敵城內賊人數百自西門出衝我綠旗兵我與侍衛富紹德爾森保等接戰來援賊衆亦至夾攻我兵隨衝斷賊陣分三路敗走亦即分兵追勦

至鄂根河賊衆爭渡殺溺甚衆我兵惟披甲昂
蘇蘭陣亡領催色爾呼德得傷六處披甲六十
五得傷九處據順德訥報稱我兵敗賊後城西
門外尚有賊衆數百侍衛鄂里克塔等衝擊賊
大敗入城鄂里克塔及侍衛達克塔納俱得鳥
鎗傷又總管扎爾善等報稱同侍衛奇泰叅領
額林車鄂爾魁喀爾瑪勒圖等領右翼兵衝斷
賊陣追至河口計殺溺賊人八百餘又據委署

營總阿爾噶勒沁報稱領官兵六十餘人擊敗賊五百餘侍衛噶布舒奎瑪岱等追至河口計殺溺賊亦八百餘厄魯特侍衛班第署驍騎校特木德勒圖披甲威滿察吉克定察陣亡又得傷者八名據端濟布報稱同侍衛齊凌扎卜諾爾本齊努渾公袞楚克白吉朗袞扎卜額林沁等衝賊右翼追至河口復將逃往蘇巴什山之賊人三百餘全行勦殺我兵得傷者五名等語

查來援賊衆共三千餘人據俘獲人口供稱霍集占率其伯克十餘人聚集各城人馬前來敗逃時左肩中箭未透衣服等語此次勦賊殺溺死者計一千六百餘人收獲贊巴喇特烏鎗十烏鎗五百弓箭撒袋百長鎗千刀斧等械五十鎖子甲三十馬一百駝二百傷斃駝馬無算又陣獲大纛二臣額敏和卓識為霍集占之纛其鐫刻圖寫字樣俱回部經教之語非屬下伯克

等所敢用謹一併封奏又俘獲賊人多羅特瑪
特訊係英噶薩爾城之伯克據供隨霍集占至
鄂根河遇前次托和璽敗遁之伯克阿布都哈
里克同受傷賊人三十餘告知二千人俱被勦
殺伯克鄂郭勒中箭身死霍集占駐候援兵二
日遣人探知庫車城尚未破遂于十五日夜趲
行至天明被大兵勦殺我等逃散不知霍集占
存亡信息霍集占所帶從伊犁脫歸之回人二

千貿易回人五百新降之沙喇斯瑪呼斯五百
又阿克蘇烏什馬步兵各一千計兵五千有馬
者三千伊兄波羅泥都領兵二千在喀什噶爾
防範布魯特從前霍集占與各頭目定議以甫
免為厄魯特役使今若投誠又當納貢不若自
長一方種地守城足為扞禦波羅泥都云從前
受辱於厄魯特非大國兵力安能復歸故土
思不可負即兵力亦斷不能抗霍集占不從又有屬

下伯克等助其狂悖冀有掠獲起程時波羅泥都追送書信云聞大國有兵由特穆爾圖淖爾前來作何備禦霍集占今加意防守及行至鄂根河聞托和鼐之衆盡被勦殺衆人畏懼勸阻霍集占仍執意前來遂至此敗去年春間有布魯特之伯克呼瓜為喀什噶爾頭目所管千戶因霍集占曾搶掠布魯特之冲噶巴什哈卜察克兩鄂拓克遂啟猜疑率屬徑回布魯特波羅

泥都惟恐啟釁亦不曾追趕至大國使臣阿敏
道及兵丁數十名俱留養於葉爾羌霍集占此
次來援帶至阿克蘇始行戕害等語查多羅特
瑪特尚悉回部情事但重傷將死未便追其顯
戮謹即行正法奏入

上諭軍機大臣曰據雅爾哈善等奏稱逆酋霍集占
率賊衆數千親援庫車大臣官兵等斬馘寨旗逆
酋負傷僅免深屬可嘉著查明功績等次造冊送

部議敘公衮楚克頭等台吉朗衮扎卜閑散台吉
額林沁在軍前素稱効力此次益為奮勉著加恩
賞衮楚克孔雀翎朗衮扎卜封為公額林沁授為
頭等台吉將軍雅爾哈善叅贊大臣額敏和卓哈
寧阿一體交部議敘額敏和卓前年自瓜州移居
吐魯番魯克察克特牲隻間有傷損著雅爾哈善
等籌議賞給價值籽種俾生計充裕貝子玉素富
著賞緞六端亦交部議敘散秩大臣伯克鄂對總

管職銜噶岱默特色梯巴勒氏各賞緞四端伊等
子弟五人各賞緞二端其陣亡官兵著交部照例
議卹領催色爾呼德披甲六十五得傷甚重色爾
呼德賜號克爾車凱巴圖魯六十五賜號固濟爾
巴圖魯賞銀各一百兩又雅爾哈善等前奏我兵
奮勇縋城賊人鎗礮木石競下我兵倒落者十數
人亦有得傷者縋城得傷較野戰尤為竭力著查
明加倍議敘此次戰功誠為卓越但稍有不愜朕

心者當此賊人破膽即宜乘勝派兵急追且賊遠
道來援我兵以逸待勞偵逆首所逃之地并力攻
擊渠魁既獲各城必望風歸命不知雅爾哈善等
曾否如此辦理抑或因滿洲兵少不敷調遣可傳
諭伊等倍加奮勉再所奏庫車西門有賊人出城
形跡即於十里外見賊衆塵起似內外豫先約會
然後同時舉事若使賊得通信必我卡倫防守不
嚴雅爾哈善等即查明嚴加議罪具奏至波羅泥

都雖云人尚謹愿頗勸阻其弟然此言亦不可深信伊果能將霍集占擒獻再行酌量辦理今亦不妨遣人諭波羅泥都及各城回衆以霍集占悖逆罪重所欲得者惟此一人與爾等無涉但遣我軍中回人恐被賊戕害可憫惟于俘獲人口內遣往更為妥協俱著雅爾哈善等作速奏聞併傳諭兆惠等遵照前旨速赴回部合軍進剿雅爾哈善奏摺即錄寄伊等閱看

辛卯

諭巴里坤辦事副都統阿里衮豫籌糧運事宜

上諭軍機大臣曰近派察哈爾兵一千名令侍衛訥齊訥總管薩木都卜領至巴里坤前赴雅爾哈善軍營著傳諭阿里衮將應行豫備口糧駝隻就現在之數派撥如有不足即行文黃廷桂辦送俟訥齊訥等到日即可進行再運送口糧駝隻若自己里坤遲達軍營長途未免疲乏此時應先撥駝隻

於吐魯番一帶有水草處豫行牧放以備更換其吐魯番何處水草較好應需駝若干著阿里衮與黃廷桂永貴定長等酌議具奏

壬辰

定邊將軍兆惠等疏奏招服布魯特部落情形兆惠等奏言臣等前抵布魯特境收服薩伊克薩喇巴哈什兩鄂拓克頭目圖魯起拜等遣侍衛烏爾登托倫泰等同往招撫各部落六月初

四日據烏爾登等報稱五月十二日至圖魯起
拜之游牧地名珠木罕次日傳齊所屬宣讀

恩旨適塔拉斯頭目邁他克之子額什博托亦在此
地一同跪聽俱以手加額叩首告稱我等久欲
為

大皇帝臣僕被準噶爾阻隔今始得如願不勝欣悅
詢額什博托云塔拉斯有四千餘戶係瑪木特
呼里比總管哈喇博托邁塔克阿克拜分領由

此處行走五六日可至托倫泰於十四日起程
前往招撫烏爾登於十八日至圖固斯塔老與
薩喇巴哈什頭目車里克齊相見次日宣

旨衆俱歡悅叩拜如前車里克齊等獻牛羊百頭願
謁見將軍赴京入

覲於六月初三初四等日行至軍營臣等恭述

皇上恩諭撫納并示以哈薩克歸誠情事若有厄魯
特逋逃在爾境內者即當縛獻衆皆合掌叩首

云強如厄魯特俱已勦滅富如哈薩克俱已降
附我等微小部落不歸誠

聖主更將何往臣等又告以進勦回部之兵由吐魯
番一路想已事竣但布魯特在葉爾羌喀什噶
爾之右倘逆首窮迫來投或經由爾境應協力
擒送以承

恩賞車里克齊等敬諾復云我等舊游牧地求給賞
為業臣等曉示云爾等曾被厄魯特驅逐借安

集延等處游牧即現在耕種之納里特珠木罕
塔拉斯等處從前尚為厄魯特所據今大基平
定準噶爾格根喀爾奇喇特穆爾圖淖爾等處
仍須安設卡倫伊犁有大兵駐防若爾等游牧
狹隘惟抒誠懇請恭候

大皇帝天恩指賞不可私行遷徙車里克齊等敬諾
如初又詢以入

覲人數據稱我瑪木特呼里比年九十餘身體過胖

坐時腹垂至地不能乘馬惟車里克齊圖魯起
尼沙三人赴京等語初六日臣等設宴令觀騎
射衆皆驚羨初九日派三等侍衛達桑阿照看
車里克齊等赴京其托倫泰招撫之塔拉斯侯
回報續具奏

聞奏入得

旨下部知之

諭定邊將軍兆惠等分兵搜捕逸賊事宜

上諭軍機大臣曰據兆惠等奏稱伊等分兵擒勦厄
魯特餘孽伊自造哈至和爾岱海喇巴特搜捕向
喀什伯勒齊爾與富德會合等語此等地方不但
無哈薩克錫喇等賊亦未必有嗎哈沁惟造哈和
爾岱等處與回部相近即由此往會雅爾哈善至
富德所奏經由布魯特塔拉斯游牧抵西哈薩克
邊界偵探哈薩克錫喇信息搜捕吹沙喇孽勒餘
賊等語從前兆惠富德雖有分兵之奏而由何路

回至伊犁尚未奏及朕即諭富德務由沙喇摩勒
回轉又諭策布登扎布領兵由北路策應今覽所
奏與前旨適相符合富德其加意搜捕逆賊若慮
兵少即由沙喇摩勒通信策布登扎布速往會合
俱著傳諭知之

命安西提督豆斌分管綠旗兵丁

上諭軍機大臣曰從前屢諭豆斌巡查臺站搜捕沿
途之嗎哈沁等嗣據奏報所獲無幾看來未必有

大隊賊人藏匿著將現領兵丁就近前赴雅爾哈
善軍營其馬得勝所領綠旗兵即著豆斌分管

癸巳

申諭靖逆將軍雅爾哈善等速擒賊首事宜

上諭軍機大臣曰逆酋霍集占親授庫車為雅爾哈
善等擊敗奏到時朕即謂彼時若能乘勝追逐必
獲渠魁但恐滿洲兵少不敷調遣詢問伊等如何
辦理夫我兵尚欲遠攻葉爾羌喀什噶爾以擒霍

集占罪人斯得則各城望風款附今霍集占自來
送死我兵既奪其纛逆酋負傷僅免此即擒賊之
一大機會且雅爾哈善等三人於勦賊時駐兵高
岡以望形勢彼時雖不知霍集占親來之信而賊
纛續經認識又有俘獲人口供詞若遣哈寧阿領
兵追襲逆酋未必即回巢穴或被追入沙雅爾阿
克蘇即移庫車之兵併力攻擊與直取葉爾羌等
城何異若慮移兵時庫車賊人出城追襲則亦如

勦殺援兵之例更覺便於殲滅乃徒以兵少坐失機會朕甚惜之昨已傳諭兆惠就近領兵與雅爾哈善會合即有索倫兵二千餘斯時斷不可坐困庫車須分兵另取一城或將軍營久駐之馬換給乘騎一切機宜俱當酌量辦理至軍營索倫等兵効力年久已派兵二千更換但此時未能即到且兵不厭多若有年力精壯仍願留營効力者即分別加賞其餘人俟更換後賞給遣回仍以朕旨宣

示云留營之兵必不曠日持久用昭體卹愛養之意所有現在情形著作速奏聞

甲午

靖逆將軍雅爾哈善等疏奏擊敗庫車賊衆及賽里木歸降信息

雅爾哈善等奏言六月十八日辰刻庫車城下有騎賊三百步賊八百餘來往行走以誘我兵臣等駐兵排陣疊放鎗礮殺賊六十餘人賊復

來毀我軍壘又勦殺四十餘人賊衆遂擁擠入城不及回顧我兵仍向稠密處攻打是以傷賊甚多城內晝夜哭聲震動此次擊賊巴圖魯侍衛海蘭察阿拉善署叅領烏巴什得烏鎗傷吉林索倫蒙古兵得傷者八人綠旗兵陣亡者十一人守備察凌阿得烏鎗傷又兵丁得傷者三十二人是日有賽里木城回人阿瓜斯伯凱遣人報稱將霍集占所用之伯克阿里等擒獻率

五百餘戶歸降俟來至軍營續具奏

聞奏入

上諭軍機大臣曰覽雅爾哈善等所奏勦殺庫車賊衆二百餘人餘皆擁擠入城不敢復出是賊膽已寒自可計日攻克此次奮勇効力及陣亡得傷官兵著查明送部議叙議卹得城後留貝子玉素富駐守雅爾哈善等即領兵前進庫車圍久未破負固宜懲著將壯丁俱行勦殺量留老弱若賊人此

時被迫獻城則仍行寬貸但渠魁必當正法可派
員解送來京行至巴里坤即加拘繫至回人阿瓜
斯伯凱等雖舉城歸附亦不可輕忽當收取軍器
置其妻子於庫車附近村莊俟各城平定仍歸舊
地亦可可傳諭雅爾哈善等留意辦理

命陝西等省增購糧運騾頭

上諭軍機大臣曰前經降旨令陝西河南二省辦騾
一千五百頭恐不敷用著陝西河南各增購騾一

千頭山東購騾一千頭山西購騾二千頭統于今
歲九月趨解肅州均毋遲悞可傳諭鍾音胡寶琮
塔永寧阿爾泰知之

大學士管陝甘總督黃廷桂疏奏籌運軍營糧
餉

黃廷桂奏言臣因西路大兵現在庫車糧運關
係緊要查口外遐曠路徑多可旁通聞有可自
哈密直趨闢展吐魯番一帶之路隨委員查勘

據報有夾山路徑騾駝皆可通行水草饒裕較
繞行巴里坤更近三站今奉

諭旨令籌庫車阿克蘇等城駐防官兵糧運可否行
車臣即會同阿里衮委員迅往查勘但思若俟
覆到之日始由巴里坤辦運未免稍遲不若此
時先將糧石運貯吐魯番以後只由吐魯番轉
運更加迅速臣擬於此時將哈密現辦車騾留
其半運送巴里坤備貯糧石分其半竟由哈密

運至吐魯番收貯若勘明可以行車即委員修理如山險不便請迅飭甘省各屬挑買健驢解送俟直督及山陝撫臣購辦駝騾到日均令由哈密運往軍營回空之時再將吐魯番購備糧石轉運軍營較之巴里坤又省吐魯番往回之二十餘站似覺更速奏入

上諭軍機大臣曰黃廷桂所奏籌辦庫車等處糧運一摺甚合機宜若拘泥成規必俟查明道路解到

駝隻始由巴里坤起運前往即極力趲赴已需時
日朕正在降旨籌辦而黃廷桂即能計慮及此請
將糧石運貯吐魯番與朕旨適相脗合閱奏不勝
欣慰黃廷桂身體素弱如此悉心計畫朕不惟嘉
之且深憐之也其從前所請辦駝一萬隻已諭直
隸等處購買可傳諭知之

乙未

議酌籌增辦馬匹事宜

軍機大臣奏言黃廷桂所奏酌籌增辦馬匹一摺奉

旨交臣等速議具奏臣等恭查前奉

諭旨令該督豫備明年二萬官兵口糧係統計進勦兵數而言並非專用綠旗兵二萬該督所奏綠旗兵二萬人給馬一匹加以官員隨後得馬二萬五千匹已足敷用等語似屬悞會查解往巴里坤共馬一萬七千匹又陝甘兩省派撥營馬

五千匹新舊買補馬內派撥八千匹共得三萬之數即如所奏再飭各營撥出五千匹亦止三萬五千若以綠旗二萬加以吉林索倫察哈爾官兵仍不敷用現在雅爾哈善辦理回部若今年可取庫車大兵前抵阿克蘇則來年需用綠旗兵不過一萬再加亦不過一萬五千其吉林等兵約以五千為率人給馬三匹綠旗兵人給馬一匹合之官役數已足用此外若有急需自

可於軍營騎回馬內挑選供應至巴里坤留養馬匹既不便過多則續派之一萬八千匹應如所奏於十月內酌量遠近送至肅州加意飼秣俟軍營需用豫為知會再行分起轉解亦可無悞奏入

上諭曰來歲進勦回部合吉林索倫察哈爾及綠旗兵不過一萬五千人即再多亦不過二萬該督籌辦一切具見實心然看來未免稍形拮据轉恐遠

近傳聞張皇其事當以靜鎮密籌為要至馬騾駝
隻又交直隸及各省購辦現又於鄂爾多斯購馬
四千匹駝一千隻自可無悞軍行著再傳諭知之
己亥

命派出健銳營兵丁由哈密前赴庫車

上諭軍機大臣曰現在派健銳營官兵一千名於七
月二十八日自京起程分為五起每間二日按起
行走可傳諭黃廷桂京兵出口之後即由哈密取

道前赴庫車較之經由巴里坤更為直捷其應給馬匹口糧即在哈密豫備并傳諭布政使銜德舒即赴哈密妥協辦理仍著甘肅巡撫吳達善親往督率甘肅現有賑卹事宜蘭州省城不可無大員經理著布政使蔣炳自肅回蘭辦事

壬寅

申諭靖逆將軍雅爾哈善等進取回城事宜

上諭軍機大臣曰昨雅爾哈善有豫籌撤兵之奏雖

亦先時部署但伊等身為將軍叅贊大臣衆所觀
聽既懷撤兵之念則情形自必宣露恐官兵等知
之不免懈怠退縮且我兵圍城日久防守漸疎賊
衆或乘隙衝突逃走亦未可定朕深為厯念用兵
之道當于易懈之時益加意警備方無貽悞凡賊
可逃之路自必安設卡倫但須多派兵丁防禦倘
賊人衝突以大兵追擊更於要路堵截又安所逃
至霍集占甚屬詭詐此時或又集衆來援當以偏

師相持而大隊從間道直走其後兩路夾擊自當就擒雅爾哈善等宜相機辦理若不以殲渠為要務而徒事得一城再攻一城則區區庫車尚不能猝下由此而阿克蘇葉爾羌喀什噶爾愈難攻克安望成功况我兵雖未克庫車而賽里木即已降附則回部大勢可知前聞波羅泥都與霍集占不協或遣新降回人為間而所得之城仍令管領但量派綠旗兵協同防守先聲所至必有相繼迎降

者總之惟在當事之人其志先定則雖暫有艱阻
必終歸成就斷不可豫生畏憚其加意奮勉以佇
捷音

臣等謹案逆賊霍集占偕德怙亂糾黨應援
脅從之衆咸懷觀望若罪人斯得則諸城震
警款附矧其冒死入城無異釜魚阱獸苟偵
諜速而堵截嚴未有不早就俘獲者我

皇上握符審幾當塞旗克敵之日即先事周防惟恐

游魂偷息致稽捷奏而

諄諭及之且庫車木下附近城邑早已約降賊人情
見勢絀乘間奔軼亦事理所必然至若頑兵
持久疎懈易生斯時加意戒嚴尤軍志所最
亟厥後降人踵至詢及情形始知逆賊出入
自如與逆黨阿布都克勒木等先後倖脫雖
終歸獻馘而重煩敵愾皆由任事者養癰貽
患恭繹前後

諭旨坐照如神不獨么麼小醜無所施其伎倆即將
率之畏葸恒怯亦不能自掩其情形矣

申諭定邊右副將軍策布登扎布等策應叅贊大臣

富德

上諭軍機大臣曰據策布登扎布等奏稱與巴祿同
追舍楞至古爾班察爾與阿桂合兵知舍楞已入
俄羅斯隨派副都統鄂博什等前往索取又前遣
往哈薩克索取布庫察罕之納旺等尚未回報因

與阿桂暫行駐候巴祿仍巡查臺站等語所辦尚合機宜朕前屢諭策布登扎布策應富德計奉到此旨時阿布賚已將布庫察罕縛送策布登扎布即同阿桂前往與富德合兵向阿布勒噶爾索取哈薩克錫喇如飾詞延緩或適屆撤兵之期亦即相機酌辦頃已諭副都統德爾素為叅贊大臣在科卜多辦事阿桂不必回科卜多倘業經轉回即來京請訓至巴祿既仍舊巡查臺站從前達禮善

敏珠爾多爾濟等追勦阿巴噶斯哈丹等游牧日
久未見奏報巴祿著在額林哈畢爾噶等處探聽
達禮善等所在協力勦除餘賊毋徒以搜捕嗎哈
沁為事并傳諭知之

諭定邊左副將軍成袞扎布辦理烏梁海等事宜

上諭軍機大臣曰據扎隆阿奏稱烏梁海原任總管
博郭勒之子恩克率所屬七十餘戶逃走現在軍
木楚克扎布已領兵一百名近往追捕等語可傳

諭成衮扎布於應行調度事宜豫為籌辦至成衮
扎布前奏追索舍楞一事如何辦理及領兵現於
何處駐劄作速奏聞

大學士管陝甘總督黃廷桂疏奏解送之厄魯
特人口病故屬實

黃廷桂奏言臣欽奉

諭旨以軍營解送之厄魯特等病斃大半有無疎脫
捏報情節查詢辦理今厄魯特納默庫等及賚

瑪里木集賽等男婦人口於七月初四五等日
解到肅州隨同軍需局司道等官逐一查詢據
供實因長途饑疲致斃且沿途看守無處脫逃
衆口相同尚無捏報情節奏入報

聞

癸卯

申諭靖逆將軍雅爾哈善等奮勉進取回城

上諭軍機大臣曰據阿里衮奏稱由巴里坤運送庫

車口糧牲隻已於七月初起程又辦米五百石接濟官兵糧餉俟車驟齊集亦即趲運等語看來巴里坤供給軍需自無貽誤近復諭吳達善等由哈密豫備糧餉送往軍營且官兵數次勦賊及回城田野種植俱應有收穫何必籌及撤兵可傳諭雅爾哈善等以奮勉効力為要

定邊將軍兆惠疏奏右翼布魯特歸誠

兆惠奏言准富德咨稱侍衛烏爾登招降布魯

特瑪木特呼里比遣其弟舍爾伯克等入

覲計六月十八日可至軍營烏爾登因托倫泰未到
令布魯特人往迎俟降人一到即令托倫泰伴
送十九日烏爾登率舍爾伯克及其族弟呼岱
巴爾氏來營查瑪木特呼里比遣弟入

覲甚屬恭順應即派烏爾登伴送赴京又所招布魯
特人內有克勒德拜者為衆所服因先出痘不
敢入京向臣等求給印文招撫各處布魯特臣

酌量給發又有貿易回人阿卜達喇瑪阿卜都喇伊木願往招降安集延等處回衆臣即允其給文約於來春至伊犁相會又運送糧餉之健銳營前鋒托克托拜等於五月二十三日在昌吉斯被哈薩克三百餘騎搶掠續遇其頭目額爾類諭知官兵什物即行查出交還并稱前奉將軍發給印文此行原為查拏哈薩克錫喇等語其情形甚為恭順再二月間侍衛額爾登額

因馬蹊傷脛不能行走請送至巴里坤調理奏
入

上諭軍機大臣曰據兆惠等奏稱侍衛馬爾登招降
布魯特馬木特呼里比遣其弟舍爾伯克入覲等
語烏爾登伴送入覲之布魯特等行至巴里坤肅
州等處俱著優加宴賚以示慈惠其貿易回人願
往招降安集延等處回衆恐伊等如期來至伊犁
自當豫為守候庶不失信遠人策布登扎布富德

回兵時即在彼駐劄辦理或酌派大員亦可至托克托拜遇哈薩克額爾類將屬人所掠官物查出交還具見誠懇著賞額爾類緞四端仍傳旨嘉獎并諭以據擒獲人口所供哈薩克錫喇在阿勒沁部落如能傳示縛獻必沛殊恩前鋒托克托拜行走龜勉著授為藍翎侍衛其侍衛額爾登額受傷既重即回京調理俱各傳諭知之

平定準噶爾方略正編卷五十八